

Evening Dogri (NSD) Bulletin 27-12-2024

आकाशवाणी

खबरां ---

- 1 साबका प्रधानमंत्री डॉ. मनमोहन सिंह हुंदी अंतिम जात्तरा कल कांग्रेस दे मुख्यालय थमां शुरू होगा।
- 2 केंद्री मंत्रीमंडल नै डॉ. मनमोहन सिंह होरेंगी 2 मिनट दा मौन रक्खियै श्रद्धांजलि भेंट कीती।
- 3 राष्ट्रपति, उपराष्ट्रपति ते प्रधानमंत्री मोदी होरें डॉ. मनमोहन सिंह होरें गी श्रद्धांजलि भेंट कीती।
- 4 साबका प्रधानमंत्री डॉ. मनमोहन सिंह हुंदे काल मगरा उंदे सम्मान च 7 दिनें दे सरकारी सोग दी घोषणा कीती गई।
- 5 विदेश मंत्री डॉ. एस जयशंकर होरें अमरीका दे विदेश मंत्री एंटनी ब्लिंकन हुंदे कन्नै मलाटी कीती ते भारत ते अमरीका दी सांझेदारी दी समीक्षा कीती।
- 6 महिलाएं दे क्रिकेट च भारत नै वेस्ट इंडीज़ गी 5 विकेटें कन्नै हराई दित्ता ते सीरीज़ 3-0 कन्नै जित्ती लैती ऐ।

<><><><><><>

Final Journey

साबका प्रधानमंत्री डॉ. मनमोहन सिंह हुंदी अंतिम यात्रा कल नमीं दिल्ली च कांग्रेस दे मुख्यालय थमां श्मशान घाट तगर बडुलै साड्डे 9 बजे शुरू होग। इक सोशल मीडिया पोस्ट च कांग्रेस दे महासचिव के.सी वेणुगोपाल होरें आखेआ ऐ जे साबका प्रधानमंत्री हुंदे पार्थिव शरीर गी कल बडुलै पार्टी कार्जकर्ताएं ते लोक श्रद्धांजलि देई सकदे ना।

<><><><><><>

Cabinet

अज्ज केंद्रीय मंत्रीमंडल नै साबका प्रधानमंत्री डॉ. मनमोहन सिंह हुंदा काल होई जाने उप्पर बसोस प्रगट करदे होई आखेआ ऐ जे उंदे जाने कन्नै राष्ट्र नै इक मन्ने-परमन्ने दे अर्थ शास्त्री ते प्रतिष्ठित नेता गी खोई दित्ता ऐ। उनें डॉ. मनमोहन सिंह हुंदी याद च शोक प्रस्ताव बी पारित कीता ते 3 मिनट दा मौन रक्खियै श्रद्धांजलि बी दित्ती। प्रस्ताव च आखेआ गेआ जे डॉ. सिंह होरें 1991 थमां 1996 तक्कर भारत दे वित्त मंत्री दे तौरै उप्पर कम्म कीता हा ते आर्थिक सुधारें दी इक व्यापक नीति शुरू करने च उंदी भूमिका महत्वपूर्ण ऐ। इस प्रस्ताव च उंदे शैक्षणिक दे कन्नै-कन्नै सरकारी ते सार्वजनिक जीवन बारै बी दस्सेआ गेआ।

<><><><><><>

Global-Leaders

दुनिया भरै थमां नेताएं साबका प्रधानमंत्री डॉ. मनमोहन सिंह होरें गी श्रद्धांजलि दित्ती ऐ। उनें साबका प्रधानमंत्री डॉ. सिंह होरें'गी इक राज्यवादी ते दूरदर्शी नेता दे तौर पर चेत्ता कीता। अमरीका दे विदेश मंत्री एंटोनी ब्लिंकन होरें अपने मुख्य आसेआ भारतीय लोकें कन्नै संवेदना जताई ऐ। उनें डॉ. मनमोहन सिंह होरें'गी

भारत-अमरीकी रिश्ते गी मजबूत करने दा श्रेय दित्ता ऐ। तोआई, ब्राजील दे राष्ट्रपति लूला डा सिल्वा होरें भारत, ब्राजील, दक्खन अफ्रीका, डायलाग फोरम ते ब्रिक्स समूह गी कायम करने च साबका प्रधानमंत्री डॉ. मनमोहन सिंह हुंदे योगदान गी चेत्ता कीता। इयां गै मालदीव दे साबका राष्ट्रपति मोहम्मद नाशिद, भारत च रूस दे राजदूत, नेपाल दे विदेश मंत्री डॉ. अर्जु राणा देयोबा ते भारत च फिनलैंड, कोरिया, नार्वे दे राजदूतें सब्बनें साबका प्रधानमंत्री डॉ. मनमोहन सिंह हुंदा काल होई जाने पर अफसोस प्रगट कीता ऐ।

<><><><><><>

Tributes-Manmohan

राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें साबका प्रधानमंत्री डॉ. मनमोहन सिंह हुंदे घर जाइयै उनेंगी श्रद्धांजलि भेंट कीती। एहदे मगरा प्रधानमंत्री नरेंद्र मोदी होरें इक वीडियो स्नेह च साबका प्रधानमंत्री डॉ. मनमोहन सिंह हुंदा काल होई जाने पर अफसोस जाहिर कीता। उनें आखेआ जे मनमोहन सिंह हुंदा जीवन औने आहिलियें पीढ़ियें लेई मिसाल ऐ जे कियां परेशानियें थमां उप्पर उठिये नमियां उंचाइयां हासल कीतियां जाई सकदियां न। उनें अगगे आखेआ जे मनमोहन सिंह होरें गी इक ईमानदारी व्यक्ति ते उच्चे दर्जे दे अर्थशास्त्री दे तौर पर चेत्ता कीता जाग। उनें एहू बी आखेआ जे प्रधानमंत्री पी.वी नरसिम्हा राव हुंदे मंत्रीमंडल च डॉ. सिंह होर वित्त मंत्री हे ते उनें इस बेल्ले दे 1991 आहली आर्थिक संकट दौरान माली ते आर्थिक खेत्तर च

नमें सुधारें लेई महत्वपूर्ण भूमिका निभाई ही। तोआई, केंद्री मंत्री अमित शाह, जे.पी नड्डा, राजनाथ सिंह, ज्योतिरादित्य सिंधिया, कांग्रेस नेता सोनिया गांधी, लोकसभा च विपक्ष दे नेता राहुल गांधी, कांग्रेस अध्यक्ष मल्लिकार्जुन खड़गे ते होर दुए नेताएं बी डॉ. मनमोहन सिंह हुंदे घर जाइयै उनेंगी पुष्पांजलि भेंट कीती। साबका प्रधानमंत्री डॉ. मनमोहन सिंह हुंदा अंतिम संस्कार कल साढ़े 9 बजे होग। इक सोशल मीडिया पोस्ट च कांग्रेस दे महासचिव के.सी वेणुगोपाल होरें जानकारी दिती जे डॉ. सिंह हुंदी अंतिम जात्तरा कल बडुलै कांग्रेस मुख्यालय थमां शुरू होग ते श्मशान घाट तगर जाग। कल बडुलै पार्टी कार्यकर्ताएं ते लोक साबका प्रधानमंत्री होरें गी श्रद्धांजलि देई सकदे न।

<><><><><><>

National Mourning

सरकारै साबका प्रधानमंत्री डॉ. मनमोहन सिंह हुंदे काल मगरा उंदे सम्मान च 7 दिनें दे सरकारी सोग दी घोषणा कीती ऐ। डॉ. मनमोहन सिंह हुंदा खीरी संस्कार पूरे राजकीय सम्मान कन्नै कीता जाहग। इस दौरान मुख्य भरै च राश्ट्री झंडा अद्दा झुके दा रौहग ते कोई बी सरकारी मनोरंजन आहला कार्यक्रम आयोजित नेई होग। विदेशें च स्थित सारे भारती मिशनें ते दूतावासें च बी खीरी संस्कार आहले ध्याड़े राश्ट्री झंडा अद्दा झुके दा रौहग। साबका प्रधानमंत्री डॉ. मनमोहन सिंह होरेंगी श्रद्धांजलि भेंट करने लेई अज्ज दिनै 11 बजे केंद्री मंत्रीमंडल दी बैठक बी लग्गी।

<><><><><><>

Economist Mourning

मन्ने-परमन्ने दे अर्थ शास्त्रियें पूर्व प्रधानमंत्री मनमोहन सिंह हुंदे निधन पर बसोस प्रगट कीता ऐ। आई.एम.एफ दी उपनिदेशक गीता गोपीनाथ होरें आखेआ ऐ जे 1991 च वित्त मंत्री दे तौरा पर उंदे आसेआ शुरू कीते गेदे आर्थिक सुधारें कन्नै कई युवा अर्थ शास्त्रियें गी प्रेरणा मिली। प्रधानमंत्री हुंदे आर्थिक सलाहकार परिषद दे सदस्य संजीव सान्याल होरें आखेआ ऐ जे भारत लेई 1947 ते 1991 20मीं सदी दे दो मते महत्व आहले बरे रेह। इक बरा रानीतिक आजादी ते दुआ आर्थिक आजादी लेइए आया। JSW Group दे चेयरमैन ते M.D सज्जन जिंदल होरें बी डॉ. सिंह हुंदा काल होई जाने उप्पर बसोस प्रगट कीता। अमरीकी-भारत बिजनेस काउंसल नै बी डॉ. मनमोहन हुंदा काल होई जाने पर डूंगा बसोस जाहिर कीता ऐ।

<><><><><><>

Sushaashan-Saptah

चौथे सुशासन सप्ताह 2024 ते “प्रशासन गांव की ओर” अभियान दा समापन बुधवारें होई गेआ। प्रशासनिक सुधारें ते लोक शकैतें दे मैहकमे नै सुशासन सप्ताह ते इस म्हीने दी 19 थमां 25 तरीक तगर चलाए गेदे देशव्यापी “प्रशासन गांव की ओर” अभियान दौनें दा आयोजन कीता। एहू भारत दी सब्बनें शा बड्डी मुहिम

ऐ जेड़ी नागरिक केंद्रित शासन ते सेवाएं गी घरें तगर उपलब्ध करोआने उप्पर
केंद्रित ऐ। अपने इक स्नेह च प्रधानमंत्री होरें आखेआ ऐ जे प्रशासन गांव की ओर
शड़ा नारा नेई ऐ, सगुआं असरदार शासन गी ग्रांड दे लोकें दे कच्छ आहने दा
इक जत्त ऐ।

<><><><><><>

PM Mann Ki Baat

प्रधानमंत्री नरेन्द्र मोदी अपने माहवार रेडियो कार्यक्रम "मन की बात" दे राएं
औंदे ऐतवारें 29 दिसम्बर गी देश-विदेश च रौहने आहले श्रोताएं कन्नै बचार
सांझे करडन। हर म्हीने दे अखीरले ऐतवारें दिनै 11 बजे प्रसारत होने आले इस
कार्यक्रम दी एहू 117मीं किशत होग। मन की बात दा प्रसारण आकाशवाणी ते
दूरदर्शन दे समूलचे नेटवर्क पर कीता जाहग। एह्दे इलावा एहू प्रसारण
आकाशवाणी खबरें दी वैबसाइट ते न्यूज़ ऑन ए.आई.आर मोबाइल ऐप पर बी
उपलब्ध होग। एह्दे कन्नो कन्नी आकाशवाणी समाचार, डी.डी न्यूज़, प्रधानमंत्री
हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी एह्दी लाइव
स्ट्रीमिंग उपलब्ध होग। आकाशवाणी परा मन की बात दे प्रसारण दे तुरत मगरा
मकामी भाशाएं च एह्दा अनुवाद बी प्रसारण कीता जाहग।

<><><><><><>

S.Jaishankar WDC

विदेश मंत्री डॉ. एस जयशंकर होरें कल वाशिंगटन डी.सी च अमरीका दे विदेश मंत्री एंटनी ब्लिंकन हुंदे कन्नै मलाटी कीती। डॉ. जयशंकर हारें इक सोशल मीडिया पोस्ट च आखेआ ऐ जे इस बैठक च पिछले 4 बरें च भारत ते अमरीका दी सांझेदारी दी प्रगति दी समीक्षा कीती गई। उनें आखेआ जे भारत-अमरीका सरबंध स्थाढ़े आपसी हितें दे कन्नै-कन्नै वैश्विक हितें लेई बी कम्म करंगन।

<><><><><><>

Jaishankar-Washington

विदेश मंत्री डॉ. एस जयशंकर होरें अज्ज वाशिंगटन च भारती दूतावास दी टीम ते न्यूयार्क, चिकागो, सैन फ्रांसिको, सिएटल, हाउसटन ते अटलांटा च स्थित काउंसल जनरल्स दी टीम कन्नै मलाटी कीती। उनें भारत-अमरीका दी सांझेदारी गी होर मजबूत करने दे मौकें उप्पर चर्चा कीती जिंदे च तकनीक, बपार ते निवेश उप्पर ध्यान दिता गेआ।

<><><><><><>

Court Katra

जम्मू-कश्मीर ते लद्दाख हाईकोर्ट दे मुख् न्याऽधीश ताशी राबस्तान होरें रियासी जिले लेई प्रशासनिक जज जस्टिस मोहम्मद अकरम चौधरी हुंदी मजूदगी च अदालती परिसर कटड़ा दा उद्घाटन कीता। जम्मू-कश्मीर हाउसिंग बोर्ड आसेआ इस परियोजना गी तोढ चाढेया जा करदा ऐ ते एह्दे पर अंदाजन कोई 15 करोड रुपें दी लागत औग। इस मौके बोलदे होई मुख् न्याऽधीश होरें आखेआ जे

न्याऽपालिका ते न्याऽ उपलब्ध करोआने सरबंधी प्रणाली च लोके दा विश्वास
बरकरार रक्खने च बैच ते बार दी भूमिका बड़ी बड़ी ऐ। उने आखेआ जे लोक
अदालते गी न्याऽ दा मंदर समझदे न ते बड़ियां मेदां लेइयै अदालते च औदे न
इसकरियै अदालते दी बी एह जिम्मेदारी बनदी ऐ जे ओह सबबने गी सखल्ले
न्याऽ उपलब्ध करोआना जकीनी बनान।

<><><><><><>

Women Cricket Ind vs WI

महिलाएं दे क्रिकेट च भारत नै अज्ज वडोदरा दे कोटाम्बी स्टेडियम च खेड्डे गेदे
मजूदा श्रृंखला दे अखीरले मैच च वेस्ट इंडीज़ गी 5 विकेटें कन्नै हराइयै श्रृंखला 3-
0 कन्नै जित्ती लैती। भारत दी तरफा दीप्ति शर्मा नै 31 रन्ज देइयै 6 विकेटां
लैतियां ते इक नमां कीर्तिमान अपने नांऽ करी लैती ऐ। उंदे इस बेहतरिन प्रदर्शन
दी बदौलत भारत नै छडे 38 ओवरें ते 5 गेंदें च गै वेस्टइंडीज़ दी पूरी टीम गी
162 रन्जें पर आउट करी दित्ता। लक्ष्य दा पिच्छा करदे होई भारती टीम नै 5
विकेटां मुहाइयै 28 ओवरें ते 2 गेंदें च 167 रन्ज बनाई लैते।

<><><><><><>

Cricket-Ind.Aus Test

भारत ते अस्ट्रेलिया बश्कार 5 टेस्ट मैचें दी बार्डर-गावस्कर श्रृंखला दे मैलबोर्न च
खेड्डे जा करदे चौथे टेस्ट मैच दे अज्ज दुए ध्याडे भारत नै दिनै दा खेड्ड मुक्कने तगर

5 विकेटें दे नुकसान पर 164 रन्ज बनाए ते ओहू अजें बी अस्ट्रेलिया कोला 310 रन्ज पिच्छे ऐ। एह्दे शा पैहले अस्ट्रेलिया नै अपनी पैहली पारी च 474 रन्ज बनाए न। अस्ट्रेलिया दी तरफा स्टीव स्मिथ नै 140 रन्जें दी पारी खेड्डियै मेजबान टीम गी मजबूत स्थिति च पुजया। भारत दी तरफा जसप्रीत बुमराह नै 4 ते रविन्दर जडेजा नै 3 विकेटां लैतियां। भारती टीम दे खड्डारिएं साबका प्रधानमंत्री डाक्टर मनमोहन सिंह हुंदे सम्मान च अज्ज अपनी बाहीं पर काली पट्टी बन्नियै मैच खेड्डेआ।

<><><><><><>

Amit-Shah BBSSL

केंद्री गृह ते सहकारिता मंत्री अमित शाह होरें आखेआ ऐ जे बीए सरबन्धी भारती सहकारी समिति लिमिटेड (बीबीएसएसएल) गी ऐसे बीए दे उत्पादन पर मता ध्यान देना चाहिदा जिंदे च घट्ट पानी ते घट्टोघट्ट कीटनाशकें दी लोड होऐ। नमीं दिल्ली च बी.बी.एस.एस.एल. दी समीक्षा बैठक दी अध्यक्षता करदे होई उनें आखेआ जे लौहके करसानें गी बद्धोबद्ध संभव उपज हासल करने दे जतन जकीनी बनाने लोडचदे न। गृह मंत्री होरें आखेआ ऐ जे प्रधानमंत्री नरेन्द्र मोदी हुंदे “सहकार थमां समृद्धि” दे नजरिये गी साकार करने ते करसानें गी सशक्त बनाने च बीबीएसएसएल दी महत्वै आहली भूमिका ऐ। उनें बीबीएसएसएल गी भारत दे पारंपरिक बीए दे संग्रहण ते संरक्षण पर ध्यान केंद्रित करने दा आह्वान कीता। श्री शाह होरें समिति लेई बरे 2025-26 तगर 20 ज्हार बादू सहकारी

समितियों कन्नै जुडने दा लक्ष्य रक्खेआ। गृह मंत्री होरें आखेआ जे बीबीएसएसएल भारत दे पारंपरिक रूप कन्नै पौष्टिक बीएं दे संग्रह ते संरक्षण दी दिशा च तेजी कन्नै कम्म करै करदा ऐ।

<><><><><><>

DG-WHO

डब्ल्यू.एच.ओ दे Director General Tedros अधानोम ग्रेबेयस होरें आखेआ ऐ जे यमन दी राजधानी सना च हुथी समूह आसेआ गिरफ्तार कीते गेदे संयुक्त राष्ट्र दे 13 स्टाफ सदस्यें दी रिहाई बारै गल्लबात समाप्त होई गई ऐ। अपने इक सोशल मीडिया पोस्ट च ग्रेबेयस होरें आखेआ ऐ जे डब्ल्यू.एच.ओ हिरासत च लैते गेदे व्यक्तियों दी फौरन रिहाई लेई लगातार आवा'रदी रौह्ग। संयुक्त राष्ट्र नै जून महीने इस गल्ल दी पुष्टि कीती ही जे उंदे 13 स्टाफ सदस्यें गी सना च हुथी समूह नै हिरासत च लैता ऐ। ग्रेबेयस होरें आखेआ जे सना अंतरराष्ट्री हवाई अड्डे उप्पर हवाई बम्बारी दा सामना करना पवा रदा ऐ। जिसले जे ओहू संयुक्त राष्ट्र ते डब्ल्यू.एच.ओ दे किश अधिकारी यमन दी राजधानी सना थमां अपनी उडान च चढने आहले हे। इज्रायल नै कल यमन दे पच्छमी तट ते अंदरूनी यमन उप्पर हुथी नियंत्रित फौजी गी निशाना बनाइयै हवाई हमले शुरू कीते।

<><><><><><>